

**BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO RADA I SOCIJALNE POLITIKE**

Prednacr

**ZAKON
o preuzimanju finansiranja neizmirenih doprinosa
za penzijsko i invalidsko osiguranje za osiguranike zaposlene u Federaciji
Bosne i Hercegovine u periodu 01.04.1992. – 31.12.2015. godine**

Sarajevo, mart 2016. godine

ZAKON
o preuzimanju finansiranja neizmirenih doprinosa
za penzijsko i invalidsko osiguranje za osiguranike zaposlene u Federaciji
Bosne i Hercegovine u periodu 01.04.1992. – 31.12.2015. godine

POGLAVLJE I. OPĆE ODREDBE

Član 1.

Ovim zakonom se uređuju uvjeti, način, izvor i sredstva za finansiranje neizmirenih doprinosa za penzijsko i invalidsko osiguranje za period od 01.04.1992. do 31.12.2014 godine za osiguranike zaposlene u privrednim društvima, javnim preduzećima i ustanovama u Federaciji Bosne i Hercegovine (u daljem tekstu: „Federacija BiH“).

Član 2.

Neizmireni doprinosi za penzijsko i invalidsko osiguranje, u smislu ovog Zakona su doprinosi koji se odnose na period osiguranja od 01.04.1992. do 31.12.2014 godine, a za koja do dana stupanja na snagu ovog Zakona nisu izvršene uplate.

Član 3.

(1) Uplata neizmirenih doprinosa za penzijsko i invalidsko osiguranje u skladu s ovim Zakonom odnosi se na osiguranike u Federaciji BiH koji se vode u evidencijama o osiguranicima u Federalnom zavodu za penzijsko i invalidsko osiguranje (u daljem tekstu: „Federalni zavod“), kao prijavljeni na osiguranje u periodu od 01.04.1992. do 31.12.2014 godine, a koji su u navedenom periodu bili zaposleni u privrednim društvima, javnim preduzećima i ustanovama.

(2) **Pravo iz stava 1. ovog člana može se ostvariti samo pod uvjetom da su poslodavci isplaćivali ili obračunavali najniži iznos plaće propisane Općim kolektivnim ugovorom za teritorij Federacije BiH.**

POGLAVLJE II. OSNOVICA STOPA I POSTUPAK IZMIRENJA DOPRINOSA ZA PENZIJSKO I INVALIDSKO OSIGURANJE

Član 4.

(1) Osnovica za obračun doprinosa za penzijsko i invalidsko osiguranje po jednom mjesecu osiguranja za koji nije uplaćen doprinos je minimalna osnovica za uplatu doprinosa za penzijsko i invalidsko osiguranje važeća u mjesecu u kojem ovaj Zakon stupa na snagu.

(2) Stopa doprinosa koja se primjenjuje je stopa doprinosa iz plaće i drugih primanja osiguranika i stopa doprinosa na isplaćene plaće na teret poslodavca, obje važeće u mjesecu u kojem ovaj Zakon stupa na snagu.

(3) Obračun penzija za korisnike iz člana 3. ovog Zakona vršit će se u skladu sa članom 48. Zakona o penzijskom i invalidskom osiguranju

("Službene novine Federacije BiH", br. 29/98, 49/00, 32/01, 73/05, 59/06,4/09 i 55/12).

Član 5.

- (1) Zahtjev za ostvarivanje prava po ovom zakonu **obavezno** podnosi poslodavac za zaposlene koji su bili u radnom odnosu u periodu i pod uvjetima iz ovog Zakona, **a kojima nije uplaćen obavezni doprinos za penzijsko I invalidsko osiguranje.**
- (2) Zahtjev se podnosi Federalnom zavodu - prema sjedištu poslodavca.
- (3) Uz zahtjev se podnosi:
 - a) spisak zaposlenih kojima nije uplaćen doprinos, koji sadrži period za koji nije uplaćen doprinos, sa ugovorom o radu ili odlukom, odnosno rješenjem o zasnivanju radnog odnosa, te obavezno podatak o datumu sa kojim je zaposlenik ispunio uvjete za penzionisanje, odnosno kada zaposlenik navršava uvjete za penzionisanje po osnovu propisanih godina života odnosno penzijskog staža;
 - b) pismenu saglasnost zaposlenog da prihvata uplatu doprinosa u skladu sa ovim zakonom;
 - c) dokaze da su zaposleni u tom periodu bili prijavljeni na osiguranje;
 - d) dokaze o ispunjavanju uvjeta iz člana 3. ovog Zakona;
 - e) dokaz da se na njih ne odnose odredbe člana 17. ovog Zakona;
 - f) plan reorganizacije, koji je odobren i uvojen od strane nadležnih organa ili dokaz da je pokrenut stečajni ili likvidacioni postupak.
- (4) Poslodavac je dužan da najkasnije 30 dana prije isteka roka za podnošenje zahtjeva utvrđenog ovim Zakonom, u službenim prostorijama objavi spisak iz st. 3. ovog člana i omogući uvid zaposlenima i drugim zainteresovanim licima.

Član 6.

- (1) Zahtjev za ostvarivanje prava po ovom Zakonu mogu podneti i osobe:
 - a) koje su bile u radnom odnosu kod poslodavca koji je prestao da postoji (stečaj, likvidacija i dr.);
 - b) koje su prešle na rad kod drugog poslodavca;
 - c) za koje poslodavac nije podnio zahtjev iz člana 5. ovog Zakona.
- (2) Za umrlog osiguranika, zahtjev iz stava 1. ovog člana može podnijeti osoba koja ispunjava uvjete za sticanje prava na porodičnu penziju.
- (3) Zahtjev iz st. 1. i 2. ovog člana podnosi se Federalnom zavodu, a uz isti se obavezno podnose dokazi iz člana 5 stav 3. ovog Zakona.

Član 7.

Zahtjev iz čl. 5. i 6. ovog Zakona **podnosi se** u roku od **šest** mjeseci od dana stupanja na snagu ovog Zakona.

Član 8.

- (1) Na osnovu zahtjeva iz čl. 5. i 6. ovog Zakona i drugih podataka kojim raspolaže Federalni zavod će utvrditi: osiguranike koji imaju staž osiguranja za koji nisu uplaćeni doprinosi za penzijsko i invalidsko osiguranje, poslodavce kod kojeg su bili ili su još uvijek u osiguranju, periode takvog staža osiguranja za svakog osiguranika pojedinačno, iznos potrebnih sredstava za uplatu doprinosa za penzijsko i invalidsko osiguranje za svakog osiguranika pojedinačno, kao i ukupan iznos potrebnih sredstava, te datum sa kojim je zaposlenik ispunio ili potencijalno navršava uvjete za penzionisanje.
- (2) Federalni zavod u roku od 90 dana od isteka roka iz člana 7. ovog Zakona **sačinjava** izvještaj o svim podacima iz stava 1. ovog člana i isti putem Federalnog ministarstva rada i socijalne politike (u daljnjem tekstu: Ministarstvo), dostavlja Vladi Federacije Bosne i Hercegovine (u daljnjem tekstu: Vladi Federacije BiH), koja će se odrediti o ovom izvještaju u roku od 30 dana od zaprimanja istog.

Član 9.

Usvojeni izvještaj iz stava 2. člana 8. ovog Zakona se objavljuje u „Službenim novinama Federacije Bosne i Hercegovine“ i na zvaničnoj internetskoj stranici Vlade Federacije BiH i Federalnog zavoda.

Član 10.

- (1) Osobe koje smatraju da mogu ostvariti pravo predviđeno ovim Zakonom, a nisu obuhvaćene usvojenim izvještajem iz stava 2. člana 8. ovog Zakona, imaju pravo u roku od 30 dana od dana objavljivanja izvještaja iz člana 9 ovog Zakona u „Službenim novinama Federacije Bosne i Hercegovine“ podnijeti Federalnom zavodu zahtjev za uvrštavanje u isti, sa dokumentacijom kojom raspolažu i dokazuju svoje tvrdnje.
- (2) Federalni zavod odlučuje o zahtjevu iz stava 1. ovog člana u skladu sa odredbama Zakona koji reguliše upravni postupak.

Član 11.

O usvojenim zahtjevima iz člana 10. ovog Zakona i sudskim presudama, Federalni zavod sačinjava i podnosi izvještaj Vladi Federacije BiH na usvajanje svaka tri mjeseca, a Vlada Federacije BiH postupa u skladu sa odredbama stava 2. člana 8. i člana 9. ovog Zakona.

Član 12.

- (1) Federalni zavod je obavezan svaka 3 mjeseca sačiniti i dostaviti, putem Ministarstva, Vladi Federacije BiH spisak osoba koje ispunjavaju uslove za ostvarivanje prava na penziju prema odredbama Zakona o penzijskom i invalidskom osiguranju.

- (2) Vlada Federacije BiH će posebnim odlukama odobravati uplatu doprinosa za penzijsko i invalidsko osiguranje za konkretne osobe sa spiska iz stava 1. ovog člana.
- (3) Po izvršenoj uplati na osnovu odluke iz stava 2. ovog člana, Federalni zavod poduzima potrebe radnje radi evidentiranja staža osiguranja u bazi podataka osiguranika za godine za koje je izvršena uplata, i to kao staža osiguranja za koji su uplaćeni doprinosi za penzijsko i invalidsko osiguranje.
- (4) Postupak u vezi evidentiranja podataka o stažu osiguranja i doprinosa za penzijsko i invalidsko osiguranje, evidentiranja promjene zaduženja, novih zaduženja, brisanja kamata, evidentiranja uplata u Poreznoj upravi Federacije BiH i druga provedbena pitanja uredit će se jedinstvenim pravilnikom Federalnog zavoda i Porezne uprave Federacije BiH, na koji će saglasnost dati Ministarstvo i Federalno ministarstvo finansija.
- (5) Pravilnik iz stava 4. ovog člana donijet će se u roku od 3 mjeseca.
- (6) O uplati sredstava, broju osoba koje su uvedene u pravo i vremenu za koje je utvrđen staž osiguranja Federalni zavod, jednom mjesečno obavještava Ministarstvo.

Član 13.

Osobe iz člana 3. ovog Zakona, kojima je utvrđeno pravo na uplatu doprinosa za penzijsko i invalidsko osiguranje, u skladu sa odlukom Vlade Federacije BiH iz člana 12. ovog Zakona, prava iz penzijskog i invalidskog osiguranja mogu ostvariti tek nakon što potrebna sredstva budu uplaćena na žiro račun Federalnog zavoda.

POGLAVLJE III. FINANSIRANJE

Član 14.

- (1) Federacija BiH će u skladu sa ovim zakonom i sredstvima predviđenim u Budžetu Federacije BiH osigurati Federalnom zavodu potrebna sredstva za uplatu doprinosa za penzijsko i invalidsko osiguranje za osiguranike i periode iz člana 3. Zakona.
- (2) Sredstva iz stava 1. ovog člana mogu se osigurati iz sljedećih izvora:
- Kredita
 - Izdavanjem dužničkih vrijednosnih papira od strane Federacije BiH,
 - Prodajom imovine iz pasivnog podbilansa Federacije BiH,
 - Prodajom kapitala u vlasništvu Federacije BiH,
 - Ostalih posebnih izvora.
- (3) Osigurana sredstva za uplatu doprinosa iz stava 1. ovog člana, poslodavac čija su dugovanja izmirena, dužan je pod povoljnijim uslovima, vratiti Federaciji BiH u roku od 10 godina, izuzev privrednih društava u čijem osnovnom kapitalu je državni kapital čiji je vlasnik Federacija BiH, kanton, grad ili općina, zastupljen sa više od 50%, javnih preduzeća i ustanova, te poslodavaca iz člana 6. stav 1. tačka a. i člana 18. ovog zakona,

(4) Uslove i način povrata sredstava iz stava 3. ovog člana posebnim aktom uredit će federalni ministar finansija.

Član 15.

Nakon što Federacija BiH izvrši uplatu doprinosa za osiguranike iz člana 3. ovog Zakona, Vlada Federacije BiH će putem nadležnih institucija pokrenuti aktivnosti za utvrđivanje eventualne odgovornosti uprave preduzeća iz razdoblja za koji nisu plaćeni doprinosi.

POGLAVLJE IV. PRIJELAZNE I ZAVRŠNE ODREDBE

Član 16.

- (1) Nadzor nad primjenom ovog Zakona vrše Ministarstvo i Federalno ministarstvo finansija, svako u okviru svoje nadležnosti.
- (2) U vršenju nadzora ministarstva iz stava 1. ovog člana mogu radi otklanjana eventualnih nejasnoća u provedbi ovog Zakona davati obavezujuće upute Federalnom zavodu i Poreznoj upravi Federacije BiH.

Član 17.

- (1) Prava iz ovog Zakona mogu ostvariti samo osobe koje nisu ostvarile pravo na penziju do dana stupanja na snagu ovog Zakona.
- (2) Osiguranici kojima je u bazi matične evidencije registriran poseban staž iz člana 94. Zakona o penzijskom i invalidskom osiguranju, u periodu iz člana 3. ovog Zakona, ne ostvaruju prava po ovom Zakonu za isti period.

Član 18.

- (1) Izuzetno prava iz ovog Zakona mogu ostvariti osobe koje su u periodu od 30.04.1992 do 31.12.1992. godine, bile na radnoj obavezi ili u službi civilne zaštite opština Bosanski Brod, Derventa, Modriča, Odžak, Bosanski Šamac, Orašje i Brčko.
- (2) Detaljnije uvjete, postupak za ostvarivanje prava iz stave 1. ovog člana propisat će pravilnikom Federalno ministarstvo za pitanja boraca i invalida odbrambeno-oslobodilačkog rata u saradnji sa Ministarstvom.
- (3) Izuzetno prava iz ovog Zakona mogu ostvariti osiguranici u Federaciji BiH koji se vode u evidencijama o osiguranicima u Federalnom zavodu, kao prijavljeni na osiguranje u periodu od 01.04.1992. do 31.12.2014 godine, koji su u navedenom periodu bili zaposleni u savezima osoba sa invaliditetom i privrednim društvima za zapošljavanje osoba sa invaliditetom.
- (4) Detaljnije uvjete, postupak za ostvarivanje prava iz stava 3. ovog člana propisat će pravilnikom Ministarstvo.
- (5) **Pravilnik iz stava 4. ovog člana donijet će se u roku od tri mjeseca.**

Član 19.

- (1) Pravne osobe koje podnesu zahtjev za izmirenje neuplaćenih doprinosa za penzijsko i invalidsko osiguranje za razdoblja osiguranja iz člana 1. ovog Zakona, a koje nakon 31.12.2014. godine i dalje nisu plaćale doprinose, obavezne su u roku od 60 dana od dana stupanja na snagu ovog Zakona pokrenuti stečajni postupak.
- (2) Odredba stava 1. ovog člana ne odnosi se na javna preduzeća niti javne ustanove.
- (3) Javna preduzeća mogu ostvariti prava po ovom zakonu samo pod uvjetom da uz zahtjev iz člana 5. ovog zakona dostave i plan finansijske konsolidacije preduzeća, na koji je saglasnost dalo resorno ministarstvo.

Član 20.

Za određivanje kategorija osiguranika iz člana 3. ovog Zakona i perioda osiguranja, mjerodavni su podaci matične evidencije o osiguranicima i obveznicima uplate doprinosa koju vodi Federalni zavod i podaci Porezne uprave Federacije BiH.

Član 21.

Ovaj Zakon stupa na snagu osmog dana od dana objavljivanja u „Službenim novinama Federacije Bosne i Hercegovine“.

O b r a z l o ž e n j e

Prednacrtu Zakona o preuzimanju finansiranja neizmirenih doprinosa za penzijsko i invalidsko osiguranje za osiguranike zaposlene u Federaciji Bosne i Hercegovine u periodu 01.04.1992. – 31.12.2015. godine

I USTAVNI OSNOV

Ustavni osnov za donošenje ovog Zakona sadržan je u odredbama tačke d) Amandmana VIII na Ustav Federacije Bosne i Hercegovine, a u vezi s članom IV.A.20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donošenje propisa o finansijama i finansijskim institucijama Federacije i fiskalna politika Federacije, a Parlament Federacije Bosne i Hercegovine je ovlašten za donošenje zakona o obavljanju funkcija federalne vlasti, te člana III. 2. e. Ustava Federacije Bosne i Hercegovine kojim je u oblasti socijalne politike utvrđena podijeljena nadležnost između kantona i Federacije.

Prema odredbama člana IV A. 20. (1) d) Ustava Federacije Bosne i Hercegovine, Parlament Federacije Bosne i Hercegovine nadležan je za donošenje Zakona o obavljanju funkcija federalne vlasti.

II NAČELA NA KOJIMA SE ZASNIVA ZAKON

Ovaj Zakon se zasniva na načelima zakonitosti, socijalne sigurnosti, solidarnosti, nediskriminacije, ekonomičnosti, efikasnosti, javnosti i transparentnosti.

III RAZLOZI ZA DONOŠENJE ZAKONA

Duži vremenski period u Federaciji BiH imamo situaciju da osobe prema evidencijama imaju ispunjene uvjete za ostvarivanje prava iz penzijskog i invalidskog osiguranja, ali ista praktično ne mogu ostvariti radi činjenice da nisu plaćeni doprinosi za penzijsko i invalidsko osiguranje. Radi činjenice se navedena kategorija osoba nalazi u vrlo teškoj ekonomsko-socijalnoj situaciji, bez ikakvih primanja, većinom bez zdravstvene zaštite, te bez realnih izgleda da neplaćeni doprinosi budu izmireni od strane poslodavaca, ocijenjeno je da

Federacija BiH ima obvezu da riješi navedni problem u kom smislu se opredjelilo za sistemsko rješenje u vidu posebnog zakona.

U svrhu realizacije navedenog, Rješenjem Vlade Federacije BiH V. broj 580/2015 od 22.05.2015 godine, formirana je Interresorna radna grupa za izradu nacrtu Zakona o uvezivanju radnog staža radnicima u privrednim društvima sa većinskim učešćem državnog kapitala, sa zadatkom da u roku od 2 mjeseca sačini radni tekst predmetnog zakona i isti dostavi Federalnom ministarstvu rada i socijalne politike, na dalje postupanje.

S tim u vezi, Radna grupa je sačinila Prednacrt Zakona o preuzimanju finansiranja neizmirenih doprinosa za penzijsko i invalidsko osiguranje za osiguranike zaposlene u privrednim društvima sa većinskim državnim kapitalom u Federaciji Bosne i Hercegovine u periodu 01.04.1992. – 31.12.2014 godine, te isti dostavila Federalnom ministarstvu rada i socijalne politike, na daljnje postupanje, koje je nakon obrade zakon uputilo u propisanu proceduru usvajanja. Na Ekonomsko socijalnom vijeću za teritorij Federacije BiH, predmetni tekst je u više navrata razmatran, te je zaključeno kako obuhvat zakona treba proširiti na sve radnike u Federaciji BiH, bez obzira na vlasničku strukturu poslodavca.

IV OBRAZLOŽENJE PREDLOŽENIH PRAVNIH RJEŠENJA

Članom 1. definisan je predmet zakona gdje je precizirano da će se istim urediti uvjeti, način, izvor i sredstva za finansiranje neizmirenih doprinosa za penzijsko i invalidsko osiguranje za period od 01.04.1992. do 31.12.2014 godine za osiguranike zaposlene u Federaciji BiH, te je predviđeno da se Zakon mora odnositi na osiguranike zaposlene u svim privrednim subjektima bez obzira na vlasničku strukturu privrednih subjekata.

Tome u prilog ide i činjenica da Zakon o doprinosima FBIH (Sl. novine FBIH broj: 35/98, 54/00, 16/01, 37/01, 1/02, 17/06, 14/08) jedinstveno propisuje obaveznike doprinosa. Član 5. stav 1. navedenog Zakona glasi: obaveznik doprinosa je fizičko lice - rezident Federacije koje je na teritoriji Federacije u radnom odnosu kod pravnog ili fizičkog lica - rezidenta Federacije. Kriterij koji Zakon o doprinosima FBIH propisuje su radni odnos i teritorij, a ne vlasnička struktura privrednog subjekta.

Također, bitno je napomenuti da navedeni Zakon o doprinosima u članu 10. odvojeno propisuje stope doprinosa i to na teret osiguranika odnosno zaposlenika i na teret poslodavca/isplatitelja. Prema navedenom članu Zakona definisana je isplata na teret zaposlenika i to: - 17,00 % za penzijsko i invalidsko osiguranje, - 12,50 % za osnovno zdravstveno osiguranje, - 1,50 % za osiguranje od nezaposlenosti, te isplata na teret poslodavca/isplatitelja: - 6,00 % za penzijsko i invalidsko osiguranje, - 4,00 % za osnovno zdravstveno osiguranje, - 0,50 % za osiguranje od nezaposlenosti; - dodatni doprinos za penzijsko-invalidsko osiguranje.

Imajući u vidu navedeni član Zakona ocijenjeno je kako je i zaposlenik jednim dijelom odgovoran za neisplaćene doprinose, posebno ako uzmemo u

obzir činjenicu da su u nekim kompanijama isplaćene pune plate u iznosima mnogo većim od najniže plaće, a da pri tome nisu uplaćeni doprinosi.

Dalje, član 3., ukoliko bi obuhvatio samo dio zaposlenika ne bi bio u skladu sa članom 2. II. d) Ustava FBiH. Također, član 2. II. d) Ustava FBiH propisuje zabranu diskriminacije kao zagarantovano pravo svakog pojedinca na teritoriju FBiH.

Članom 2. propisano je da su neizmireni doprinosi za penzijsko i invalidsko osiguranje, u smislu ovog Zakona, doprinosi koji se odnose na period osiguranja od 01.04.1992. do 31.12.2014 godine, a za koja do dana stupanja na snagu ovog Zakona nisu izvršene uplate.

Članom 3. propisano je da se uplata neizmirenih doprinosa za penzijsko i invalidsko osiguranje u skladu s ovim Zakonom odnosi na osiguranike u Federaciji BiH koji se vode u evidencijama o osiguranicima u Federalnom zavodu, kao prijavljeni na osiguranje u periodu od 01.04.1992. do 31.12.2014 godine, a koji su u navedenom periodu bili zaposleni.

Članom 4. propisano je da je osnovica za obračun doprinosa za penzijsko i invalidsko osiguranje po jednom mjesecu osiguranja za koji nije uplaćen doprinos minimalna osnovica za uplatu doprinosa za penzijsko i invalidsko osiguranje važeća u mjesecu u kojem ovaj Zakon stupa na snagu, te da se stopa doprinosa koja se primjenjuje je stopa doprinosa iz plaće i drugih primanja osiguranika i stopa doprinosa na isplaćene plaće na teret poslodavca, obje važeće u mjesecu u kojem ovaj Zakon stupa na snagu. Također, ovom odredbom je određeno da se obračun penzija za korisnike iz člana 3. ovog Zakona vrši u skladu sa članom 48. Zakona o penzijskom i invalidskom osiguranju ("Službene novine Federacije BiH", br. 29/98, 49/00, 32/01, 73/05, 59/06, 4/09 i 55/12).

Članom 5. propisano je način podnošenja zahtjeva od strane poslodavca za zaposlene koji su bili u radnom odnosu u periodu i pod uvjetima iz ovog Zakona, da se isti podnosi Federalnom zavodu, a da se uz zahtjev podnosi: -spisak zaposlenih kojima nije uplaćen doprinos, koji sadrži i period za koji nije uplaćen doprinos, sa ugovorom o radu ili odlukom, odnosno rješenjem o zasnivanju radnog odnosa, te obavezno podatak o datumu sa kojim je zaposlenik ispunio uvjete za penzionisanje, odnosno kada zaposlenik navršava uvjete za penzionisanje po osnovu propisanih godina života odnosno penzijskog staža; - pismenu saglasnost zaposlenog da prihvata uplatu doprinosa u skladu sa ovim zakonom; dokaze da su zaposleni u tom periodu bili prijavljeni na osiguranje; - dokaze o ispunjavanju uvjeta iz člana 3. ovog Zakona i dokaz da se na njih ne odnose odredbe člana 17. ovog Zakona.

Također, ovom odredbom propisano je da je poslodavac dužan najkasnije 30 dana prije isteka roka za podnošenje zahteva utvrđenog ovim zakonom, u službenim prostorijama da objavi spisak iz st. 3. ovog člana i omogućiti uvid zaposlenima i drugim zainteresovanim licima.

Obzirom da po ovom članu zahtjev za ostvarivanje prava za uplatu neuplaćenih doprinosa podnosi poslodavac koji nije u stečaju i likvidaciji smatramo da taj poslodavca mora imati plan reorganizacije kompanije koji je odobren i usvojen od strane nadležnih organa. Na ovaj način će se izbjeći mogućnost da isti poslodavci ponovno ne poštuju Zakon i ne izvršavaju obaveze po Zakonu o uplati doprinosa.

Ukoliko poslodavci koji ostvaruju pravo po osnovu ovog Zakona nisu napravili plan reorganizacije i ozdravljenja kompanije iz koje se može vidjeti da kompanija ima mogućnosti da nastavi poslovanje, doći će ponovno u situaciju da ne uplaćuju doprinose. Kako bi se to spriječilo smatramo da se uz zahtjev za ostvarivanje prava mora priložiti i Plan reorganizacije kako smo naveli u primjedbi.

Članom 6. Propisan je način podnošenja zahtjeva od strane fizičkih lica bivših zaposlenika u slučajevima kada poslodavci više ne egzistiraju u kom smislu je propisano da zahtjev za ostvarivanje prava po ovom Zakonu mogu podneti i osobe: -koje su bile u radnom odnosu kod poslodavca koji je prestao da postoji (stečaj, likvidacija i dr.); -koje su prešle na rad kod drugog privatnog poslodavca ili je došlo do promjene strukture vlasništva poslodavca (državni udio u kapitalu više nije većinski); - za koje poslodavac nije podneo zahtjev iz člana 5. ovog Zakona. Navedenom odredbom, je definirano da za umrlog osiguranika, zahtjev iz stava 1. ovog člana može podneti osoba koja ispunjava uvjete za sticanje prava na porodičnu penziju, te da se zahtjev iz st. 1. i 2. ovog člana podnosi Federalnom zavodu, a uz isti se obavezno podnose dokazi iz člana 5 stav 3. ovog Zakona.

Članom 7. Propisan je rok za podnošenje, prema kojem se zahtjev iz čl. 5. i 6. ovog Zakona može da podnese u roku od **šest** mjeseci od dana stupanja na snagu ovog Zakona.

Članom 8. propisano je da će se na osnovu zahtjeva iz čl. 5. i 6. ovog Zakona i drugih podataka kojim raspolaže Federalni zavod utvrditi: osiguranici koji imaju staž osiguranja za koji nisu uplaćeni doprinosi za penzijsko i invalidsko osiguranje, poslodavce kod kojeg su bili, ili su još uvijek u osiguranju, periode takvog staža osiguranja za svakog osiguranika pojedinačno, iznos potrebnih sredstava za uplatu doprinosa za penzijsko i invalidsko osiguranje za svakog osiguranika pojedinačno, kao i ukupan iznos potrebnih sredstava, te datum sa kojim je zaposlenik ispunio ili potencijalno navršava uvjete za penzionisanje. Nadalje, ovom odredbom propisano je da je Federalni zavod u roku od 90 dana od isteka roka iz člana 7. ovog Zakona izvještaj o svim podacima iz stava 1. ovog člana **sačinjava** i isti, putem Federalnog ministarstva rada i socijalne politike, dostavlja Vladi Federacije BiH koja će se odrediti o ovom izvještaju u roku od 30 dana od zaprimanja istog.

Član 9. propisano je da se usvojeni izvještaj iz stava 2. člana 8. ovog Zakona objavljuje u „Službenim novinama Federacije Bosne i Hercegovine“ i na zvaničnoj internetskoj stranici Vlade Federacije BiH i Federalnog zavoda.

Članom 10. propisano je da osobe koje smatraju da mogu ostvariti pravo predviđeno ovim Zakonom, a nisu obuhvaćene usvojenim izvještajem iz stava 2. člana 8. ovog Zakona, imaju pravo u roku od 30 dana od dana objavljivanja izvještaja iz člana 9 ovog Zakona u „Službenim novinama Federacije Bosne i Hercegovine“ podnijeti Federalnom zavodu zahtjev za uvrštavanje u isti, sa dokumentacijom kojom raspolažu i dokazuju svoje tvrdnje. Također, propisano je da Federalni zavod odlučuje o zahtjevu iz stava 1. ovog člana u skladu sa odredbama Zakona koji reguliše upravni postupak.

Članom 11. propisano je da o usvojenim zahtjevima iz člana 10. ovog Zakona i sudskim presudama, Federalni zavod sačinjava i podnosi izvještaj Vladi Federacije BiH na usvajanje svaka tri mjeseca, a Vlada Federacije BiH postupa u skladu sa odredbama stava 2. člana 8. i člana 9. ovog Zakona.

Članom 12. propisano je da je Federalni zavod obavezan svaka 3 mjeseca sačinjavati spisak osoba koje ispunjavaju uvjete za ostvarivanje prava na penziju prema odredbama Zakona o penzijskom i invalidskom osiguranju. Spisak osoba iz stava 1. ovog člana, putem Federalnog ministarstva rada i socijalne politike, dostavlja se Vladi Federacije BiH, koja će posebnim odlukama odobravati uplatu doprinosa za penzijsko i invalidsko osiguranje za konkretne osobe **sa spiska iz stava 1. ovog člana.** Po izvršenoj uplati na osnovu odluke iz stava 2. ovog člana, Federalni zavod poduzima potrebe radnje radi evidentiranja staža osiguranja u bazi podataka osiguranika za godine za koje je izvršena uplata, i to kao staža osiguranja za koji su uplaćeni doprinosi za penzijsko i invalidsko osiguranje. Postupak u vezi evidentiranja podataka o stažu osiguranja i doprinosa za penzijsko i invalidsko osiguranje, evidentiranja promjene zaduženja, novih zaduženja, brisanja kamata, evidentiranja uplata u Poreznoj upravi F BiH i druga provedbena pitanja uredit će se jedinstvenim pravilnikom Federalnog zavoda i Porezne uprave F BiH, na koji će saglasnost dati Ministarstvo i Federalno ministarstvo finansija, te da će se o uplati sredstava, broju osoba koje su uvedene u pravo i vremenu za koje je utvrđen staž osiguranja Federalni zavod, jednom mjesečno obavještavati Federalno ministarstvo rada i socijalne politike.

Član 13. propisano je da osobe iz člana 3. ovog Zakona, kojima je utvrđeno pravo na uplatu doprinosa za penzijsko i invalidsko osiguranje, u skladu sa odlukom Vlade Federacije BiH iz člana 12. ovog Zakona, prava iz penzijskog i invalidskog osiguranja mogu ostvariti tek nakon što potrebna sredstva budu uplaćena na žiro račun Federalnog zavoda. Dakle, uvođenje u pravo (ostvarivanje penzije) moguće je samo nakon izvršene uplate doprinosa za PIO za konkretne osiguranike, gdje bi Vlada F BiH na osnovu ovog zakona donosila odluke o visini sredstava, poimeničnom spisku osiguranika čiji se staž uvezuje. Na ovaj način s jedne strane zaštitio bi se sistem PIO od “urušavanja”, a sa

druge bio bi zaštićen i Budžet Federacije BiH, gdje bi Vlada Federacije BiH zavisno od sredstava utvrđivala dinamiku uvođenja u pravo

Članom 14. propisano je da će Federacija BiH u skladu sa ovim zakonom i sredstvima predviđenim u Budžetu Federacije BiH osigurati Federalnom zavodu potrebna sredstva za uplatu doprinosa za penzijsko i invalidsko osiguranje za osiguranike i perioda iz člana 3. Zakona. Također, propisano je da se sredstva iz stava 1. ovog člana mogu osigurati iz sljedećih izvora: -Izdavanjem dužničkih vrijednosnih papira od strane Federacije BiH, - Prodajom imovine iz pasivnog podbilansa Federacije BiH, -Prodajom kapitala u vlasništvu Federacije BiH i ostalih kreditnih i drugih posebnih izvora.

Nadalje u stavu 3. propisana je obaveza vraćanja uplaćenih sredstava Federaciji BiH u roku od 10 godina, izuzev privrednih društava u čijem osnovnom kapitalu je državni kapital čiji je vlasnik Federacija BiH, kanton, grad ili općina, zastupljen sa više od 50%, javnim preduzećima i ustanovama, te kompanija koje su prestale da postoje (stečaj, likvidacija i sl.) , kao i zaposlene u savezima osoba sa invaliditetom i privrednim društvima za zapošljavanje osoba sa invaliditetom. Uslove i način povrata sredstava iz stava 3. ovog člana posebnim aktom uredit će federalni ministar finansija.

Članom 15. propisano je da nakon što Federacija BiH izvrši uplatu doprinosa za osiguranike iz člana 3. ovog Zakona, Vlada Federacije BiH će putem nadležnih institucija pokrenuti aktivnosti za utvrđivanje eventualne odgovornosti uprave preduzeća iz razdoblja za koji nisu plaćeni doprinosi.

Članom 16. propisano je da nadzor nad primjenom ovog Zakona vrše Ministarstvo i Federalno ministarstvo finansija, svako u okviru svoje nadležnosti, te da vršenju nadzora navedena ministarstva iz stava mogu radi otklanjana eventualnih nejasnoća u provedbi ovog Zakona davati obavezujuće upute Federalnom zavodu i Poreznoj upravi FBiH.

Članom 17. propisano je da prava iz ovog Zakona mogu ostvariti samo osobe koje nisu ostvarile pravo na penziju do dana stupanja na snagu ovog Zakona, te da osiguranici kojima je u bazi matične evidencije registriran poseban staž iz člana 94. Zakona o penzijskom i invalidskom osiguranju, u periodu iz člana 3. ovog Zakona, ne ostvaruju prava po ovom Zakonu za isti period.

Članom 18. propisano je da izuzetno prava iz ovog Zakona mogu ostvariti osobe koje su u periodu od 30.04.1992 do 31.12.1992. godine, bile na radnoj obavezi ili u službi civilne zaštite opština Bosanski Brod, Derventa, Modriča, Odžak, Bosanski Šamac, Orašje i Brčko, a da će detaljnije uvjete, postupak za ostvarivanje prava iz stave 1. ovog člana propisat pravilnikom Federalno ministarstvo za pitanje boraca i invalida odbrambeno-oslobodilačkog rata u saradnji sa Federalnim ministarstvom rada i socijalne politike. Ovaj dio je ubačen po zaduženju Vlade Federacije BiH, koja je svojim zaključkom naložila navedeno.

Članom 19. propisano je da pravne osobe koje podnesu zahtjev za izmirenje neuplaćenih doprinosa za penzijsko i invalidsko osiguranje za razdoblja osiguranja iz člana 1. ovog Zakona, a nakon 31.12.2014. godine i dalje nisu plaćale doprinose, obavezne su u roku od 60 dana od dana stupanja na snagu ovog Zakona pokrenuti stečajni postupak, te da se odredba stava 1. ovog člana ne odnosi se na javna preduzeća niti ustanove. Navedena odredba je propisana kako bi se pojačala odgovornost navedenih subjekata i onemogućila dalje stvaranje dugovanja. Stavom 3 propisana je obveza sačinjavanja plana finansijske konsolidacije preduzeća.

Članom 20. propisano je da za određivanje kategorija osiguranika iz člana 3. ovog Zakona i razdoblja osiguranja mjerodavni su podaci matične evidencije o osiguranicima i obveznicima uplate doprinosa koju vodi Federalni zavod i podaci Porezne uprave Federacije BiH.

Članom 21. propisano je da ovaj Zakon stupa na snagu osmog dana od dana objavljivanja u "Službenim novinama Federacije BiH".

V FINANSIJSKA SREDSTVA

Za provođenje ovog Zakona potrebna su sredstva iz Budžeta Federacije Bosne i Hercegovine, a prema procjenama koje su rađene na osnovu podataka Federalnog zavoda za penzijsko i invalidsko osiguranje i Porezne uprave Federacije BiH ista iznose:

OVAJ DIO PROCJENA SAČINIO BI SE NAKON ŠTO SE USAGLASI TEKST ZAKONA!